




dr Gnussmärt, isch ä Reis wärt



Das Sujet 2019 lautet: **dr Gnussmärt, isch ä Reis wärt**

Anlässlich der Plakettenpräsentation des FKL vor Cliquenvertretern und den Medien wurde das Geheimnis um die Plakette und das Sujet der Fasnecht 2019 am Dienstag 8. Januar 2019 in der Aula des Burgschulhauses gelüftet. Aus 17 Einsendungen wurde der Entwurf von Jürg „Güggi“ Widmer gewählt, welcher das Sujet und die wunderschöne Plakette lieferte.





„Dr Gnussmärt, isch ä Reis wärt“

Jo es isch jo ganz famos,
mir hei eusi neui Rothuusstroos.
S'isch wohr Lieschtel git sich ä Ruck,
am Gnussmärt chasch Sache ha vo Basel und vo Langebruck.

**Es isch ä gnuss euse Märt,
ä Reis uff Lieschtel isch er wärt.**

Sit em Früelig gits die Ständ im Stedtli,
chasch alles ha: Spargle, Eier und Salametli.
Do gits feins vom Hof oder Bio, aber sicher nit Gammel,
d'Produzente chöme vo Schönebuech bis Ammel.

**Es isch ä gnuss euse Märt,
ä Reis uff Lieschtel isch er wärt.**

Dr letschti Summer isch sunnig gsi und warm,
D'Buure vo Bürgle und Zunzgä präsentier es mit Charme
Blueme, Beerli, Gmies, Frücht alles duet glinge,
vo Tännike, Hämmike bis uff Ormalinge.

**Es isch ä gnuss euse Märt,
ä Reis uff Lieschtel isch er wärt.**

Du glaub'sch es nit, jetz git's no Trüffel,
bald wahrschiinlich au no Mozzarella vom Büffel.
Im Herbscht git's jetz au Wy,
die vo Sissach und ich, mir si drbi.

**Es isch ä gnuss euse Märt,
ä Reis uff Lieschtel isch er wärt.**

Im Winter git's nüt meh vo dä Äckerli,
jetz verchaufe si Chees, Brot, Späck und Läckeri.
Gmacht mit viel liebi, Härz und Stil,
si chömme vo Rüneberg, Eptigä und Mümliswil.

**Es isch ä gnuss euse Märt,
ä Reis uff Lieschtel isch er wärt.**

Uff dr Blaggedä 2019 chasch gseh,
die vier Jooreszyte und no viel meh.
jetz chunnt Lieschtel nümme druus,
d'Familie Gmiesgugge spielt dr Früchtebluus.

**Es isch ä gnuss euse Märt,
ä Reis uff Lieschtel isch er wärt.**

S' Frieligsmaitli mit Salatchopf isch am Rettich dra,
Mit dr Spargle git's S'Erdbeermami im Summer dr Takt a.
Dr Pilzpapi spielt im Herbscht uff em Glockenspiel uss Würschtli,
und d'Paukä uss Chees spielt im Winter dr Biirebueb Joggeli das Bürschtli.

**Es isch ä gnuss euse Märt,
ä Reis uff Lieschtel isch er wärt.**

